

■ PUNTO DA VISTA

La pps chanta per vilentar e provotgar

DA CLAUDIA CADRUVI / ANR

La bandiera svizra sa dauza, Dario Cologna stat sin il podest ed ins dauda l'imni naziunal. Il sportist è commuventà, smatga in larmin ed ils aspectaturs svizzers a chasa avant la televisiun èn loschs. U in'otra scena: L'emprim d'avust sa radunan vischins si mises enturn il fiu e chantinan. Lunsch enturn sin ils auters mises vesan ins fieus e sa, là festiveschan anc auters il di naziunal.

Quai èn muments nua ch'ins pensa ch'igl è bel dad esser ina Svizra u in Svizzer. Ins è cunscient da viver en in pajais liber, en ina terra che stat bain, en ina naziun ch'è per fortuna stada preservada ils ultims tschient onns da guerras. Ils pleds da l'imni n'èn betg uschè impurtants, mabain plitost quai che la melodia evoche-scha: in sentiment positiv che cumpiglia l'entir pajais, tut ils umans che vivan qua.

er en damaun ha la pps intunà en il cussegl naziunal l'imni svizzer ed ha dauzà si placats cun «Merci la Suisse!», «Danke Schweiz!» e «Grazie la Svizzera!». La partida ha vulì regurdà a la votaziun davart l'EUR avant 25 onns cura ch'il pievel aveva refusà da sa participar a l'intschess economic europeic.

L'emprim mument para quest engraziament chantà cun chalur sonora forsa patriotic. N'èsi betg bel sch'ina partida demussa engraziavladad visavi il pievel, visavi ils votants? N'èsi betg impurtant che la Svizra ha salvà sia independenza e na sto esser a nagin marschai?

Sch'ins guarda pli precis èsi dentant mo in'engraziavladad visavi la mesadad dals votants: Ils 6 da december 1992 han 50,3 per tschient dals votants refusà la partecipaziun a l'EUR. L'otra mesadad fiss gugent entrada en l'intschess economic che furma oz ina da las grondas zonas economicas dal mund cun in volumen da commerzi considerabel.

Cun il gea a quest intschess fiss la Svizra ida ina via pli simpla e fiss stada integrata en ina zona senza duanas e senza impediments. Enstagl ha la Svizra sfurzadamain stuì negoziar las cunvegns bilaterals cun l'UE per che las interpretas indigenas possian vender lur rauba en ils pajais vischins e per che l'economia restia cumpetitiva.

Ma tut tge che savura da cunvegns internaziunals vegn cumbattì da la pps – d'ina partida cun ina figura principala sco Magdalena Martullo-Blocher ch'è vegnida nunditg ritga perquai

che sia interpresa fa fatschentas cun tut il mund.

Las fatschentas sur ils cunfins svizzers ora vegnan protegidas, era per firmas svizras main pussentas che l'Ems-Chemie, da cunvegns internaziunals e cunvegns bilaterals. Las bunas relaziuns economicas furman la basa per la bainstanza svizra e gist questa bainstanza è in dals impurtants garants per nossa independenza.

Da chantar l'imni naziunal stat liber a mintgin. Ins al po era chantar per engraziari mo ad ina mesadad dals votants, mo als agens electurs u per s'inscener sco ils unics defensurs da l'independenza. Ins po perfin chantar l'imni cun l'intenziun d'excluder quels che han autras ideas politicas, per vilentar e provotgar quels che s'engaschan per ina Svizra bainintegrada en l'Europa ed en il mund.

Ina dat nagina lescha che scu-monda da malduvrar l'imni naziunal per interess particulars. Sch'ins guarda il clip en l'internet cun l'acziun da la pps dad ier en damaun, vesan ed audan ins dentant ch'igl è in chant da puntili per divider e betg per unir. Cun ils bels sentiments cura che Dario Cologna stat sin il podest u cun ils muments si mises enturn il fiu, n'è quest chant betg da cumparegliar.